




KRISTIAN THALAI

June
2014



Kristian Thalai Pawl Chanchinbu thla tin chuak

Vol V No. 4



PCI 41st Biennial Assembly-ah CKTP hruaitute leh Synod Choir



Tuikual Bial Zaipawl

Kristian Ṭhalai Pawl chanchinbu thla tin chhuak

1970-a chhuah ṭan ■ Kum 44-naa vawi 4-na ■ Chhuah tawh zat : 429

Editor :

Pu Lalmuanpuia

Joint Editors :

Pu C. Laldingliana

Upa K. Rorelkima

Pu V. Lalrinmawia

Pu Vanlalpeka

Manager :

Tv. R. Lalramnghaka

A lak man :

Kum khatah - Rs. 60.00

Copy khat - Rs. 5.00

Thu chhuah tûr nei chuan Editor, Kristian Ṭhalai, Synod Office-ah thawn tûr a ni a; a la duh chuan KṬP Office-ah a man pèk lâwk a ngai.

Office Phone : 2326372/2335821

**E-mail : kristianthalai@yahoo.com
centralktp@gmail.com**

Visit us :

**cktp.blogspot.com
www.facebook.com/centralktp**

KRISTIAN ṬHALAI PA WL

Thupui

Rawngbawl tûra chhandam

Thupui inngahna

Ephesi 2:10 Thil ṭha ti atán Krista Isuaah chuan siama awmin, ama kutchhuak kan ni si a, chu thil ṭha tih chu kan awmna tûrin Pathianin a buatsaih lâwk a ni.

Thil tumte

1. Isua Krista rinna leh amah anna kawnga ṭhalaite hruai.
2. Kohhran kut ke ni tura ṭhalaite buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

- | | |
|--|----|
| 1. Editorial | 1 |
| 2. Hlimthla | 2 |
| 3. Leader thuchah : Krista leh Kohhran tan | 3 |
| 4. Tihtur | 6 |
| 5. Presbyterian Kohhran leh a zia | 8 |
| 6. Tentmaking Mission | 12 |
| 7. Isua hi a tho leh lo | 15 |
| 8. Tuikual Pastor Bial Zaipawl Guwahati zin report | 18 |
| 9. Diamond Jubilee FAK LAM INTIHSIAK | 21 |
| 10. <i>Hringlang tlâng</i> - Pathian aw | 23 |
| 11. <i>Rimawi</i> - Zaipawl rawngbawlina | 24 |
| 12. <i>Hriselna</i> - Mut tlemin taksa a nghawng dan | 27 |
| 13. <i>Kantu</i> - Champhai Vengthlang North Branch | 30 |
| 14. Keimahni | 32 |



HUN HMAN THAT


Kan Pathian thuin, “Engkim tan hun ruat a awm,” a tih angin, khawvelah hian mi tinte hi Pathianin hun khat chauh min pe theuh va; chu hun chu a liam tawh chuan a lo kir thei tawh dawm lo. Tun hun zel hi man fuha, hmang thiam tan hlawhtlinna leh ropuina a ni. Kan naupan lai hun a liam a, vanglai hun pawh a her liam a, tu ma’n kan chelh dingin kan au kir zo lo. Puarpawheng ang leka khawvela kan awm chhung hian engtin nge hun kan hman zel dawm le? Hla phuaktuin, “Hei erawh min chhang teh - I hun i hmang tha em?” a tih hi mahni inzawh nawm fo a va tul em?

Khawvela kan awm chhung hian hlawhchhamna te, harsatna te kan tawh fo thin. Heng kan harsatna te hi hneh chang nei mah ila a dang a lo awm zel dawm a ni. Chutiang tawh lo tur chuan tu mah kan indah thei lo. Hrehawmna leh harsatnate hian min tichhiain min titha thei tih erawh hria ila. Heng harsatna kan tawhte hi min ti hnualtu ni lovin, mi dang tan malsawmna leh khawvel mite hnenah Krista aia palai kan nih theih nana min siam puitlingtuh hman i tum zawk ang u.

Pathian pawmpui tlak hlawhtlinna nei tur chuan chhel leh taima taka thawh a ngai. Malsawmna kan tihte pawh hi nghah chhuah tur ni lovin, thawh chhuah tur a ni zawk a. Mi taimate tana hai chhuah tur hi khawvelah hian Pathianin tam tak a dah a ni. Jon Calvin-a chuan, “Mihring hi saruakin lo piang mah se, hausa sain a lo piang a ni” a ti a ni. Mi hlawhtling ni tur chuan Kristian Thalaite hian eng nge kan tih tur tih chu kan ngaihtuh thiam theuh awm e.

Thalai thenkhatte chuan kan vanglai hun rei lo te hi sual rawngbawh nan kan hmang zo va, amaherawhchu kan nunah harsatna a lo thlen meuh chuan kan hun bi chhiar dan dik lohzia hriain kan inchoir a, Pathian kan mamawh leh si. Hla pakhatin, “Tling thelh apiang pawh tih a zual, a tlai lu ta an la ti ang,” a tih hi kan chanoo a ni leh mai thin. A tlai hmain Pathian tan kan hun te tha taka kan hman theih nan i fimkhur ang u♦

HLIMTHLA



■ I chanchinbu zahawm takah he thu hi min lo tihchhuahsak chuan ka lawm hle ang.

Mizo ṭawng kan hmang dik lo ta lutuk hi kan ngaimawh tlang a (a bikin Biak In chhungah). Chuvang chuan Central KṭP buatsaih booklet Branch tin ten uluk takin kan zir tlang a. Kan fimkhur phahin hma pawh kan sawn phah hlawm pawhin a hriat a, a lawmawm khawp mai.

Amaherawhchu mi thiam zawka kan ngaih, kan entawn tur leh kan lo inzirna tur ni awm tak, Central KṭP-a kan hruaitute hian an ṭawngkam hman hi an uluk lo deuh ka ti ṭhin a. General Conference-ah te hian anmahni aṭangin lo inzir deuh teh ang ka tih laiin an uluk lo ṭhin mah mah a, inzir leh deuh hi kan ngai hlein ka hria.

— C. Pazawna, Leader (2013), E. Phaileng Bial

I rawn sawi ang hian 'Mizo ṭawng hman dan' booklet hi kum 2010 khan kan zir tazoh a, ṭawngkam hman chungchangah hian Pathian kan biakna hmunah phei hi chuan fimkhur a ngai hle a ni. Kan zirhona hi a lo rei deuh tazoh pawh a ni mai thei a, kan zavaain ṭan la thar leh ṭheuh ila a duhawm hle a ni.

■ Pu Editor, Kristian Ṭhalai April thla chhuak page12-naa Kum puan chungchanga Thupui atana Bial hrang hrangte rawtna zinga mi Phuldungsei Bialten an thawh-'Thinghimna' tia in rawn ziah hi 'Thianghlimna' tih zawk tur a ni em aw?

Tin, thil pakhat -Chanchinbu hi thingtlang aṭang phei chuan kan nghakhlel ṭhin khawp mai a. Tun aia hma hian kan hmuh ve theih nan Post lamah pawh chak zawka a rawn thlen theih nan hma a lak theih em aw? (ṭan lak a hmalakna chu a awm ka ring tawh tho a)

KṭP rawngbawlna Lalpa'n Malsawm zel rawh se.

— Lalnuzira Zote, NE Tlangnuam Branch

'Thianghlimna' tih tur a ni e. Kan chanchinbu chhiar hlan nghakhleltute hi min fuihtu in ni a, kan lawm hle a ni. Kristian Ṭhalai hi a chhuah hma theih nan theihtawpin ṭan kan la a. Thla hmasa (May) issue pawh kha May ni 2-ah kan thawh chhuak a. Kan awmna hmun a zirin kan hmu hmam kan hmu tlai thei. Chutih rualin kuta office aṭanga lachhuak ṭhinte, a lak theih a ni tih kan hriattirte pawh hi rawn la har tak tak an awm ṭhin...ṭan la tlang zel ila a a lawmawm hle ang.

■ Kristian Ṭhalai chanchinbu May thla chhuak hi a kawm chauh a thar a, a chhung thu hi April thlaa mi vek a ni. Eng nge a awmzia aw.

— PC Sâwma

Press lamin copy ṭhenkhat an lo vuah sual palh a ni e...Hetiang chang palh Branch/Mimal kan awm chuan 9436142398 ah hriattir ni se, kan in thawh leh dawn nia.

Leader thuchah :

KRISTA LEH KOHHRAN TAN

— Rev. J. Lalremsiama,
Leader, Central KTP



Mizoram Presbyterian Kohhran Kristian Thalai Pâwl chuan Pathian hruainain hnung tawlh lovin hma lam kan la pan tluk tluk mai hi Kristian circle aţanga han thlir chuan thil hmuhdawm tak a tling a ni. Kan ram kohhran chanchina lang reng chu Pathianin kum 50 dan zelah thil chhinchhiah tlak tak min tihsak thin a, chungte chu, "Kum 1904-ah Kohhran Hmeichhia chu a lo ding tan a; duhawm takin a thang duang hle a; kum 50 a tling chiah a; harsatna leh dodalna kârah Kristian Thalai Pâwl chu 1954-ah a lo piang ve leh ta hlawl mai hi a ni." KTP hi a din tirh aţanga waviin thlengin a thil tum a hlen chhuah dân te, rah hlu tak tak a chhuah dân han hmuh hian pâwl hrang hrang lo piang pung zêl te nêna

khaikhinin member zei leh hmêltha, mawi leh duhawm, zaithiam leh nalh tamna ber a ni a, a ni zel turah ka ngai. Amah aţang hian kan ram hian beisei(demand) a nei tlat a ni tih i hre reng ang u.

1. **KTP hi a thang lian tial tial tur a ni :**

A din hnu kum 10 velah khân member 60,848 vêl chauh a ni a, an la tlem nâ a, an phûr a; an tak a; an nung em em mai a ni. Diamond Jubilee hial kan lo thlen takah chuan member kan pung ta hle mai. Member pawh 1,36,650 zet kan lo tling ta, Hma lam kan pan meklai hian kan mamawh chu a nghet zawnga thanlenna a ni. Thing lian pui, a ngêtin a ei ru a, rin loh taka a tlu hût ang kan nih loh nân member tinte Pathian kan rinna nunah te,

Kohhranah a nghet zawnga kan ðhanlen a pawimawh a ni. Thil dik ve reng chu p awl lianin pawl t e kan tluk lohna pakhat chu an hruaitute an sawis el ve ngai lo hi a ni. P awlt e ðhat loh vena thung erawh hi chu mahni aia lian beih an ching a, hna pui taka neih an ching hi a ni. K T P erawhchu puitling takin Saipui anga kal muah muah tur a ni.

2. K T P chuan rah a chhuah tam tial tial tur a ni ang :

Kan hriat ðheuh angin K T P hian rah hlu tak tak a chhuah tawh a, CK T P Hruaitu hmasate zing a ang khan kan Pastor entawntlak tak te leh kan Kohhran Upa chhuante an lo chhuak a; chung bakah kan ðhalaite zingah missionary tam tak an chhuak reng bawk a. A kum t elin rah a chhuah hlu telh telh a ni kan ti thei ang. Daniala 4:13-27-a Lal Nebukadnezzara mumanga thing lian pui ang khan K T P te hi kan ðhang a, kan chak a, kan ropui a; khawv el lehlama mite hriat leh sawm te kan hlawh ta hial mai.

A lawmawm a, mahse, kha thing ang khan keimahniah (kan mihring hlui) kih ngai a awm a, kan rah tlan ch aka min beiseitu an awm ðhup a ni tih hriain kan rah hi mahni'n chen lo ila, min mamawhtu apiangten an tlan khawpa kan thinthlak a ðul dawn a ni. Mi dang t ana inthin thl ak tur chu kan nei ang. Kan thla zar hnuaiah mite lo thlamuang rawh se.

3. Kan thil tum tihlawhtling z awngin hma i s awn zel ang u :

Hruaitu hmasate kh an kan thupui tur an thlan chhuah lai kha chuan an la runthlak khawp mai a. K T P te'n khawv ela Pathian min dah chhan kha kan hriat chhunzawm loh an hlau hle a ni. Chuv angin, kan din chhan ber, "*Rawngb awl tura chhandam*" tih hi kan rawngbawlna nunah eng thil mahin a hliah tur a ni lovang. Pathian rawng kan b awl dawn rau rau a nih chuan tun aia hun ðha kan nei lo. Kan thil tum Isua rinna leh amah anna lama ðhalai hruai turte lah an pung tial tial a, th a kan thlah a

thiang lo a ni. KṚP te hi Kohhran fa chuam kan ni a, Kohhran kut-kê ni tura din kan ni a. Mahse, KṚP mahni tâna nung tam, kohhran lam hawi nachang hre lo, ṭhenkhat phei chu Kohhran hruaitute (pawhin an zir bik lo a ni thei) tai deuh rân te pawh sawi tur ting chuan an awm a ni mai thei. Kan tih hauh tur a ni lo tih kan hre tlat dawn nia. Kan awmna apiangah kohhran hnathawh tipuitling zâwnga ṭhanlen kan tum zel tur a ni ang. Krista Chanchin Ṭha puan darh phei hi chu Pathianin khawvêla nung dama min la awmtirna chhan a ni tih hre reng ila. Chanchin Ṭha chu kan nunna laipui, kan

inngahna ber, kan ram leh hnam din chhuahna, kan kohhran ropuina leh thiltihtheihna thurûk a ni a. A chhuanawm tak zet a ni. Kan sum leh pai, kan thil neih hlu ber ber te kan hmang dawn emaw, kan nun hi kan chân dawn a nih rau rau chuan Chanchin Ṭha puan darh nân kan hmang ngei tur a ni ang. Mihring zingah thil tih nan mi tuin emaw hmang dawn ta se, ṭhalaite aia duhawm leh thil ti thei, tu mah an awm lo vang. Kan ṭangkaina leh hlutna tak hi a hmanna tur dik tak, Krista leh a kohhran tan kan hmang ngei tur a ni ang. Krista leh Kohhran tân KṚP hi ding zel rawh se. *Amen.*



HRIATTIRNA

Synod Multipurpose Training Centre, Mission Vengthlang, Aizawl-ah Certificate in Computer Application Course (6 months) training-na hawn a ni leh dawn a. Application Form Office-ah lamin Kohhran lehkhana Office hun chhungin theh luh tur a ni. Registration Fee Rs. 10/- leh Monthly Fee Rs. 50/- a ni a, tuang taka zir chhuak 80% kalte hnenah Incentive Prize Rs. 1200/- pek an ni.

- | | |
|---------------------------------|------------------------------------|
| 1. Dilna theh luh ni hnukung | : Ni 5.6.2014 (Thu.) |
| 2. Screening test leh interview | : SMTC, Mission Vengthlang, Aizawl |
| 3. Screening test neih hun | : Ni 6.6.2014' 10:30a.m. |
| 4. Interview hun | : Ni 10.6.2014 (Tue); 11:00 a.m. |
| 5. Class ṭan hun | : Ni 16.6.2014 (Mon); 9:30 a.m. |
| 6. Dil thei chin | : HSLC Passed |

Rev. Zosangliana Colney
Programme Director, SMTC, Mission Vengthlang

Tihtur

— Rev. R. Lalbiakmawia
Venghloi

“Nangin thil tih tur mi pek kha ka ti zo va, khawvelah ka chawimawi tawh a che” (Joh. 17:4)

Mizoram hruaitu ropui ber te zinga mi Pu H.K. Bawichhuaka chuan “Mahni tih tur tih nachang hriat hi nungchang timawitu a ni. Tih tur tih nachang hriat lohna hi chuan thlemna leh dodalna hmasa ber lakah pawh din zawh a harsain, tlukna leh petekna-in a zui nghal thin. Tih tur tih nachang hriatna erawh chuan mi chak lo ber pawh a tichakin, mi huaisenah a siam thei,” a ti a ni.

Tih tur tih hi a harsa fo thin. A chang chuan tih tur kan ko va tlate kan ti nghal peih lo va, nakina tihah kan khek a. Thil dang tih tulin min nawr leh tawh avangin hrehawm kan ti a, kan mawhphurhnate chu a rit

kan ti a, kan phun a. Tih tur kan kova tlate tha takin kan tih theih loh phah thin. Hetiang hi anih avangin sap thufing chuan “Vawiina tih tur naktuka tihah khek suh” a ti a. Tih tur ngai pawimawha ti nghal mai thin mite chuan hlawhtlinna an chang nge nge thin.

Tih tur hlen hi a harsa fo thin. America President hmasa ber George Washington-a khan a tih tur ni ngeia a hriat chu chhel tak leh huaisen takin, hlauhawm eng ang pawh a kawngah awm se tih hram a tum tlat thin an ti. England Sawrkar lak atanga zalenna an sual lai khan America sipai General a ni. British sipaihote chuan ralthuam tha zawk leh hmanraw tha zawk hmangin Washingtona leh a hote chu an um an um mai a. A thian General dangte pawh an beidawng hle tawh a ni. A thiantu chuan “Eng chen nge maw kan hnung tawlh dawn le?” tiin an zawt thin a. Ani chuan “A tul phawt chuan America tlang leh phai zawng zawng pawh kan tawlh san ang a, a la tul tak zel pawhin kan hneh hma loh chu

kan tawlh zel mai ang chu, kan tih tur chu America chhan chhuah hi zuk ni miao si a", a ti tlat mai a ni an ti a. A tawpah chuan America ram chu British-ho lakah a chhan chhuak ta a ni.

Lal Isua pawh hian a tih tur chu khawvel mihringte chhandam a ni tih a hre chiang hle mai. Mahse a kawng a bum boh avangin harsa a ti thin a, a zam hle thin. A thlan pawh thisen angin a far zawih zawih a, "Ka pa, a theih chuan he no hian mi pel lul rawh se" tiin a pa Pathian hnenah a dil hial a. Mahse, "Keia thu ni lovin, nangma thu ni rawh se" (Lk. 22:42) a ti a ni. Tih tur Pathianin a pek chu a ngai pawimawh hle mai. Chhandama kan lo awm theih nan a nunna hlu tak chu a hlan ta a ni. A va ropui em. "Nangin thil tih tur mi pek kha ka ti zo va, khawvelah ka chawimawi tawh a che" tiin a pa hnenah a sawi thei a ni.

Tirhkoh Paula pawh hian tih tur Pathianin a pek te chu a ngai pawimawh hle a ni. Jerusalema kal tura tirh niin a inhria a. "Tin, hre rawh u, tunah

hian rilrua kal lo thei lova ka inhriat avangin Jerusalem khuaah ka kal dawn hi, chutah chuan ka chung a thil lo thleng tur chin ka hre lo va, Thlarau Thianghlimin, phuarna leh hrehawmnain a hmuak a che," tiin khaw tinah min hriattir thin, chung chauh chu ka hria a ni. Nimahsela ka tlansiakna kawng ka hmabak hlen tur leh Pathian khawngaihna Chanchin Tha hriattir tur, Lalpa Isua hnenah, kha mi rawngbawl hna ka hmuh kha thawk zo phawt ila. "Ka nun pawh thlakhleh tlakah ka ruat lo ve" a ti a ni. Tih tur Pathianin a pek kha a ngai pawimawh hle mai.

Heng mi ropui tak takte hnen a tang hian tih tur Pathianin min pekte hlen chhuah dan kan zir chhuak thei ngei ang. Tan la thar zel ila. Keimah leh kan chhungkaw chung a mawhphurhna te, khawtlang leh Kohhrana kan mawhphurhna te, kan thawhpui leh kan thianta chung a mawhphurhna leh tih turte hlen chhuak thei turin tan i la thar zel ang u ♦

Presbyterian Kohhran leh a zia

— K. Remruatfela
KṚP – Bangalore Branch

A thupuiah hian ‘Presbyterian Kohhran leh a Zia’ ka han ti deuh hluai nain, a theology leh doctrine lam chu kan khawih telh dawn lo va. He thuziahin a sawi tum ber zawk chu Pathian biak inkhawm kaihhruai dan kawnga Presbyterian Kohhran zia leh nihphung KṚP member leh a hruaitute hrilh hriat a ni a. Chuvangin, zau taka pawhfan theih ni mah se, tun tumah chuan KṚP huangchhungah chauh kan rek bung hrih dawn a ni.

1. Kristian Kohhran hlawm thum te: Siam that rawngbawlhna thawktute kan tih mai thin Martin Luther te, Zwingli te, John Calvin leh mi dang dang ten Roman Catholic inkaihhruai dan an hnawl a, Kohhran siam that hna an thawh khan rawngbawltu nghet siam kha an thupui hle a. Hetih laiin Kohhran siam that hmaa an kal dan kha tha la ti pawl an la awm tho baw a. Hei hian nghawng tha lo a neih zinga pakhat chu

Kohhran pawl (Denomination) hrang hrang lo piang chhuak ve hi a ni. Chuvangin siam that hnu atang khan khawvel Kristian Kohhran pawl hrang hrangte hi hlawm thumin an then ta a. Chungte chu Presbyterian kalphung hriat chian nana a pawimawh avangin han tar lang reng reng ila:-

(a) Prelacy (Episcopal Church): Hotu bik nei Kohhran – Roman Catholic Kohhran te, Orthodox Kohhran te, Marthoma Kohhran te hi hemi huang chhunga telte chu an ni a. Kohhran inkhawm a urhsun leh a puithu ang bera kaihhruai duh tu te an ni. Tin, Kohhran inrelbawlna kawng reng rengah pawh an duh firin an duh urhsun hle a. Kohhran chetvelna kawngah an Puithiamten thuneihna sang tak an nei.

(b) Congregationalist Kohhran te: Congregationalist kan tih hote chu Roman Catholic, Orthodox, Episcopal, Methodist leh Presbyterian tih loh ho zawngte hi an ni a. Mipui dah pawimawh a, democracy uar tute an ni. Isua Krista chu Kohhran lal ber leh hotu a nihna behchhanin tualchhung Kohhran thuneihna an dah pawimawh hle. Pathian biak inkhawm up tak leh urhsun taka kalpui hi tul an ti lem lo va. Zalen taka Pathian biak leh fak

thupui bera neitute an nih avangin an boruak a zangkhaiin, an kal danah fellowship zia an chhawm nasa hle.

(c) Presbyterian Kohhran: Rawngbawltu mi mal thu ni lova, Inkhawmpui indawt chhawnga Minister leh Upaten ro an rel hona a ni a. John Calvin-a duan Kohhran kalphung zuitute an ni. Pathian biak inkhawm leh serh leh sang inkaihhruai dan kawngah Prelacy leh Congregationalist te inkara awm a ni a. Kohhran inkhawm up lutuk si lo, zangkhai lutuk bawk si lo, a inkar velah Presbyterian Kohhran chu a kal thin.

2. Presbyterian Kohhran zia chu eng nge ni ta?: Presbyterian Kohhran chu thuneitu bik awm lova, inrawn tlanga, sawi hona a tanga thu titlu chauh thin an nih avangin Inkhawmpui Kohhran emaw Committee Kohhran ti pawha sawi fiamthu an hlawh phah reng thin. Pastor hmasa Rev. Saiaithanga chuan, *“Pathian biak inkhawm hi Kohhran thlarau lam chawhlui a ni a, Kohhran nunna atan a pawimawh em em a,; chuwangin urhsun tak leh zah taka tih tur a ni. Chu chu Presbyterian Kohhran zia dik tak pawh a ni e.”* a ti a. A sawi zui zelnaah, *“Mizoram Presbyterian Kohhran inkhawm hi a urhsun lo hle a. Hei hi avang pakhat*

chu a tir lama kan thahnemngaihna, tam thuai thuai duhna vangin fimkhur leh uluk lam hi kan lo thlahthlam hman deuh a ni awm a. A tam lama thahnemngaihna vanga kan tihfel lohte chu tunah tihfel a hun ta hle a ni,” a ti a.

A chung a kan Pastor hmasain a sawi khian Presbyterian Kohhran zia chu a tarlang Chiang hle a ni. Kohhran dang – Roman Catholic leh Orthodox Kohhran thenkhatte chu an Pathian biak inkhawm kalpui danah an duh fir uchuak avangin, kawng lehlamah chuan vai Pathian bia an ang lek lek thinin a lang a. Chutih lai erawh chu Kohhran dang – UPC leh Baptist Kohhran te chuan zalenna an ngaih pawimawh luatah an inkhawm dan kalhmang a dahlauvin, Community Hall vela inkhawm an ang lek lek thinin a lang leh thung a. Chutiang karah chuan Presbyterian Kohhran chuan fimkhur leh uluk takin tak leh un ngui si lo, zalen leh dahlau lutuk si lovin zahawm takin inkhawm a kaihruai thin a. Kohhran serh leh sangte a ngai pawimawhin, Dan tlawhchhana inrelbawlna te a ngaisang em em a ni.

3. Eng hi nge kan dinhmun ni chiah?: Kohhran humhimitu ropui, Rev. Saiaithanga`n tam thuai thuai duhna vanga

fimkurna lam kan lo hlamchhiah deuh mah mah hman a lo tih ang deuh khan Mizoram Presbyterian Kohhran te hian a tir lama thahnemngaihna vanga fimkhurna chang kan lo hriat tawk loh vang hian kan Kohhran zia hi kan hloh nasa hman tawh hle a ni.

Piantharna kan inhrilhiah danah te, Chhandamna kan dawnsawn danah te leh kan Pathian biak kalphungah reng reng mikhual theology kan la nasa tawh hle a. Hlim lam lawmna kan uar tak deuh deuh avangin Presbyterianism kan kal pel tep tawh a ni. Kan hruaitu hmasate lah mipui hip ngaihna vanga an duh ang taka Kohhran an lo awp theih thin loh avangin Kohhran mipuite thinlungah Presbyterian kalphung hre lo nu leh pa, rawngbawltu kan pung chho tan tial tial niin a lang a. A hun leh a hmun mila hla sak te, Kohhran inkhawm zahawm taka kalpui te leh mumal taka inkaihhruaite kan kalpensan tial tial tan a. Kan Pathian biak inkhawm danah reng reng Worship service ai mahin fellowship zia a pu lek lek zawk tawh a. Camping zawh hlim vanglaia Kohhran inkhawm kalpui dante pheichu Vanapa Hall-a inkhawm te a ang rum rum ta mai.

Tun dinhmunah chuan Kohhran mi nghet inti ve si, Kohhran doctrine hre mumallo, Kristian Hla bua hla sak theih nei mang lo leh Presbyterian Kohhran zia hre fumfe lo rawngbawltu tam tak an awm nuk tawh a rinawm a. Harhna chang chawia, lamtualala lam leh rik luih luih thupui bera kan neih a, thlarau ta ber emaw kan tih thin avangin kan Pathian biak inkhawmah pawh Pathian duh zawng aiin keimahni duh zawng a lian mah mah thin zawk em aw tih chang tam tak a awm thin.

4. KṚP hruaituten kan hriat reng tur chu: KṚP member-te hi nakin lawka Kohhran kutke la ni mai turte kan nih avangin Presbyterian Kohhran zia humhim kawngah mawhphurhna lian tak kan nei a. Tin, chumai bakah Kohhran hnathawh ti puitlingtu tak tak te kan nih avangin kan che vel hian Kohhran dinhmun thui takin a hril a. Chuvangin, Pathian rinchhana rilru fim tak kan put hi a ngai em em a ni.

Kum 2008-a Mission Vengthlanga pawl 12 ka zir laia Rev. Lianhmingthanga thu sawi ka la hriat reng pakhat chu, *"Kohhran inkhawma kan hla sak thinte hi chhut ila Rs 5/- man pawh a tling lo hial mai awm mang e' tiin Pulpit-ah a auchhuahpui a.*

Ngaihtuahna a ti thui hle. Kohran tam tak chuan keimahni duh zawng leh tuipui zawng ang ringawtin Pathian biak inkhawm hi kan kalpui thin em aw a tih theih a. Kan biak Pathian ber hian hmun laili a chang tlem tial tial hian a hriat thin.

Chutiang dinhmuna awm kan nih avang chuan KTP member-te hian tih tur tam tak kan nei a. Kohhran fachuam tak tak leh khawvel hmasawnnain a ken tel, thiamna leh finna kawngah pawh thuk zawk leh fingvar zawk tura ngaih kan nih avangin kan Kohhran Pathian biak kalpui dan te hi ngun taka kan chik a, Presbyterian Kohhran zia a ni ang em? Lamtuala hnehna puanga au vak vak te, kan zai tui deuh avanga hla nawn vak vak te, zai laia kut lo ben vak vak te hi Kohhran inkhawm tizahawm lo tu a ni thei mai ang em, chutiang fellowship zia chu Worship Service a seng luh chi a ni ang em tihte hi ngun taka kan chik a ngai tak zet a ni.

Kohhran miten kan mamawh ber nia lang chu kan hruaitu hmasa Rev. Thansiam, Rev. Saiaithanga, Rev. Thangpuiliana etc. te anga Kohhran humhalh duh mi, thlarau ze nawiin Kohhran a rawn nek changa huai taka

Kohhran chhan nana ke pen ngam, mi tak leh fir te an ni a. Heng kan hruaitu hmasate hniakhnung hi, keini KTP member te hian kan entawna, kan zui ngam a ngai tak meuh meuh tawh a ni. Chuti ni lova, a phawvuaka KTP ah kan inhman ve ringawt a, Pathian duh dan aia keima hlimna leh lawmna mai tuipui a, member hip loh hlaua thalai inkhawmte dahlau taka kalpui a, nakina Kohhrana sengluh kan pawisa lo a nih zawngin kan Kohhran hian a zia dik tak kan bosal thuai ang a. Kan Pathian biak inkhawm te hi Vanapa Hall inkhawm ang lekah kan la chhuah mai ang tih hi a hlauhawm em em a ni. Chutiang hun a thlen vaih chuan Presbyterian Kohhran hian zia a lawi pawh a nei tawh lo vang.

Thalaite hi Kohhran nghahfak tak meuh meuh kan ni a. Chuvangin, rilru nei tak leh fim taka ngaihtuah chungin Kohhran humhim nan leh kawng dik a zawh a, keimahni hlimna leh lawmna mai ni lova Pathian duh dan anga kan kal a, Pathianin hmun laili ber a luah a, Lal Isuan hmun sang ber a chan zel theih nan Pathian rawn chungin theihtawp i chhuah zel ang u. Krista leh Kohhran – Kan Damchhan Ber Ni Se♦



Tentmaking Mission

— Zaii Khiangte
Cambodia

Rum 2008-ah khan kum nga tal mahni inchawma rawngbawla chhuah tumin ka inbuatsaih a. Khatih hun lai khan Mizo mipui tam zawkten mahni inchawma rawngbawla tentmaker dinhmun kan la hrethiam chiah lo. Tunah erawh chuan kan Synod Mission Board pawhin tentmaker-te SMB missionary anga pawm theihna dan an nei tawh a, kei pawh SMB hnuai tentmaker missionary niin ka awm mek a ni. SMB missionary dangte angin Synod aʔangin lawmman kan dawng lova, kan awmna hmuna kan thawh hlawh ang ang khan kan inchawm chu a ni mai. Kan rawngbawla danah leh kan awmna hmun thuah SMB-in kan chungah thuneih an tum lem lo a, zalen takin min dah a ni. Mahse sum leh pai a ni emaw, rawngbawlna kawnga harsatna a ni emaw puih kan ngaihna apiangah Synod hian min pui a, theihtawp a chhuah tak meuh a. Tentmaker te min

hmuh dan leh enkawl danah lung a awi em em a ni. Tentmaking hi kan la hmehhriat nasat loh avang leh tunlai khawvelah rawngbawlna hmanraw pawimawh tak a nih si avangin theih ang tawkin “tentmaking mission” ʔangkaina leh a ʔulna te kan ziak dawn a ni.

Eng nge tentmaking chu?

Tirhkohte thil tihah leh Paula lehkhathawn hrang hrangah khan Paula'n Chanchin ʔha hril pahin mahni inchawmin puan in siam hna a thawk tih kan hmu a. Paula thiltih dan dungzui a mahni inchawma hna thawk chungah Chanchin ʔha hril hi tentmaking mission chu a ni mai a, a thawktute hi tentmaker, “*puan in siamtu*” tih an ni.

Tunlaih Paula entawna mahni inchawm chungah Chanchin ʔha hril hi khawvelah ni tam tak an awm a ni. A ʔhen chu zirtirtute, engineer, doctor,

company hrang hranga thawk leh sawrkara hnathawk te pawh an ni. An hnathawk chu eng pawh ni se an tum ber chu Chanchin Ṭha hril a ni. Tunlai khawvelah tentmaker mamawhna a sang tial tial niin a lang. Ram danga hnathawk zawng zawngte hi tentmaker an ni lem lo a. Heng hnathawk ho leh tentmaker danglamna chu anni chuan inhlawhna an duh avangin hna an thawk a, tentmaker-te erawh chuan Chanchin Ṭha hril nan hna an thawk thung a ni. Tentmaker ṭangkaina leh ṭhatna ṭhenkhatte-

1. Khawvel ram tam zawk 80% vel hi missionary luh phal lohna ram a ni. Heng hmun, missionary visa neih theih lohna hmuna hian tentmaker anga luh a awlsam a. A ram mite mamawh zawng tak an thawh avangin hnar ngawt theih an ni lo.

2. Mizoram ang ram rethei aṭang chuan foreign mission emaw ram chhung rawngbawlna pawh ni se fund lamah harsatna a awm leh ṭhin. Kohhranhote sum hmanga thlen phak lohna leh kan tlin chiah lohna hmuna pawh tentmaker chuan mahni inchawmin rawngbawlna hlawhtling tak a nei thei ṭhin.

3. Ṭhenkhat chu kohhran tirha hun pum rawngbawl tura commitment siam ngam chiah lo, mahse hun eng emaw chen rawngbawl duh ve tho te an ni. Hengte tan hian tentmaking hi a ṭha hle. Term neia rawngbawlna a nih loh avangin keimahnia Pathianin a thawh ang zel leh a ṭul ang zelin a insiam rem zung zung theih.

Amaherawh chu tentmaker hian kohhran emaw organisation phuartu bik a neih hran loh avangin ringtu puitling, rinnaah pawh mi puitling ṭha tak nih a ngai thung. Khawvel hna kan thawk a ni tina kan kawm leh hmuh te ring lo an nih avangin anmahni anga awm ve mai te a awl em em a. Engkim mai a lo zalen tawh a, min phuartu an awm loh avangin mahni kal chhan hre lo leka nuam tawl pawhin a awm theih. Heng avang hian tentmaker chu ringtu puitling, mahnia tla hrang tur pawha ngaihtuah awm lo a nih a ngai. Rawngbawla chhuak tur te tana training-na hmun ṭha chu kohhran a ni. Mahni kohhrana a kul a taia inhmang ṭhinte hi rinna lamah chuan an lo puitling duh nge nge ṭhin.

Tentmaker te rawngbawl dan tlangpui :-

1. Asia ramah, a bikin SE Asia ram hrang hrangte hian sap ɽawng thiam an duh em avangin sap ɽawng zirtir hi hmanraw ɽangkai tak a ni. Ka awmna ram Cambodaa tentmaker tam zawkte pawh hi zirtirtu kan ni. Sap ɽawng zirtir paha Pathian thu sawi a remchang hle.

2. Kan thawhpuite nen kan hnathawh a inan tlat avangin an zinga miah min pawm thlap a, ɽhian siam a awlsam bik em em. Lengah te sawmin an chhuah vahpui theih a, Pathian thu hrilh nan hun remchang a tam bik a ni.

3. English Club te dinin university zirlaite huikhawm an rem hle. Sap ɽawng zirna a nih phawt chuan Bible thu zir pawh an pawi ti lo ɽhin a, an hriat thiam loh hrilh fiah paha Pathian thu hrilh an rem em em. Tin, naupang lam zirtirtu chuan class-ah theih ang tawkin Pathian thu zirtirna an zep tel fo bawk.

4. Kei leh ka ɽhiannu hi chuan sikula kan thawh bakah kar tawpah thingtlangah kalin "house church" pakhat kan enkawl a. Thawktu pakhat

chawmin a niin kartluanin naupangte sapɽawng a lo zirtir a, keini'n Pathianniah inkhawm puiin Sunday school kan neih pui ɽhin.

Heng lo pawh hi rawngbawl dan chi hrang hrang a awm. Mahni hna piah lama slum area naupang zinga thawh te, Bible lehlin na leh radio leh TV lama in hmang te, restaurant hawngte, commercial sex workers zinga rawngbawlte an awm nawk bawk.

Êng hi a nih dan tur taka a awm hian engmah dang ti tawh lo mah se a vel a chhun êng hrim hrim. Chutiang chiah chuan Êng fate hian êng fate nun dan tur renga kan va nun ringawt pawh khan eng emaw chen chu kan vel a ti êng tawh. A hranpain Pathian thu va hril chiam lo mah ila kan nun dana danglam an hmuh khan zawhna hlin an khat a, kan duh emaw duh lo emaw Chanchin ɽha hrilna remchang kan hmu tho tho. Ringtute chu tih tur hrang ɽheuh pek kan nih angin a ɽhenin tualchung kohhranah rawng kan bawl ang a, a ɽhen kan vak chhuakbawng ang. Kan Pathianin min duhna hmun ɽheuhthe ngaihtuaha ɽawngɽai chungin kan tih tur i hlen zel ang u♦

ISUA HI A THO LEH LO! "History mai a ni. Proof min hmuh ta che u"

— Zonunsanga
Tuithumhnar



un lai thiamna lo chhuak zelah hian kan Bible rin tawk lohna a lo awm a, Kristiante zingah pawh zawhna tam tak a lo piang zel. Duh khirhna leh dilchhutna a lo piang zel a, heng hi engtin nge ni ang? Isua hi a tho leh tak tak meuh maw? tia zawhna pawh a lo piang ta zel a.

Rinhleh ðhin lar zual te:

1. A zirtirten a vengtute muthilh hlanin an ru bo a nih kha. A tho leh ta tiin an zirtir mai mai a, thil mak a lo tih ðhin avang khan an awih mai mai alawm.
2. Kraws-ah khan a thi tak tak em ni? Ani te chu a ke ruh pawh an titliak lo va, kraws-ah khan a tawrhna a nasat em avangin a thidang a, thlan chhungah khan a lo harh leh alawm.
3. Lal Isua zirtirte khan an pu kha tho leh turah an ngai tlat a,

chutiang tur chuan an suangtuah tlat bawka, an mit vai a ni. Hmeichheho pheikha chuan hmuh phet tumin thlan lamah te an kal tak ang dawr dawr a (emotion nen an chawmchilh a) eng emaw chuan hmuh loh nakah. Kan rilru puthmang hian thil tam tak min hmuh tir ve ðhin a ni lo maw? tiin.

A thunawn chu : Isua kha thi-in a tho leh tak tak maw? A document proof min hmuh ru? hman lai thil thleng ve pakhat, history mai mai a ni lawm ni? Khaw nge a thlan an laih chhuah archaeological evidence chu? Khaw nge kan rin theih ngeina tura Thoma anga a naka kan zen vena lai tur chu tiin.

Pakhatna khi hetiang hian chhang dawn ta ila: A nih a vengtute kha lo muhil palh ni ta sela, engtin nge zirtirten an ru bo an tih ngawt theih? Engtik lai pawhin an veng a ni si a! 'vengtute' hi an muthilh chuan sipai danah hremna sang tak an awr thei tih kan hria. A case a zirin thih thlenga hremna a ni thei a, an muhil ti-a sawi chu a pawmawm loh deuh. Khatiang uluk taka char (seal) tichhe tur chuan thawm an neih te pawh a ngai ang a, an muhil tih hi a pawmawm lem loh.

Zawhna Pahnihna khi:

Dr. Alexander Metherall(MD) chuan kraws-a an khenbehte reng reng hi 'respiratory acidosis' vangin an thi tlangpui a, an chauh avanga mihring thawk a lo zawih zel khan Carbon Dioxide kha thisenah Carbonic acid-ah a inlet a, lungphu a tibuai a, zawi zawiin mihring an chang lo mai thin a ti a.

Ama tawngkam takin, 'acidity of blood to increase...this leads to an irregular heartbeat..' tiin a dah a, an tawrhna nasa tak avangin, 'Cardiac Arrest' in an thi thin a ni a ti a, a pawmawm hle. Medical Science pawhin a proof theih tih a sawi Chiang. (Lee Strobell, "The Medical Evidence" in the Case for Christ, p.202-203)

Pathumna hi:

Mitvai mai mai anga puhna hi rilru lam sukthlek zirna atanga (Psychologically) a pawmawm viau rual hian tan chhan tha tak kan nei a, chu chu hei hi a ni: Mi pakhat chauh chungah a inlar lo tih hi. Mi hrang hrang hnenah a inlan a ni tih Bible-ah record fel tak kan nei. Tin, Isua zirtirte leh hmeichheho hian a rawn inlan, a rawn inlar hi an ring ngai lo va, a thi a ni tih an hriat chian

em avangin an lungngai em em zawk. Chutiang lam an beisei pha lo ve.

"History mai a ni. Proof ta che u": Hei hi thui tak a dikna chen a awm ang. Nimahsela History-a a awm avang tak hian a tak (real) a ni tiin bul han tan phawt ila. A tho leh ngei a ni tih document awm theite chu:

1. 'Thlan ruak' kha document a ni e: Mit ngeia hmutu (Eye Witness) kan hmu a, (Mat 28:1-10; Mk 16:1-8; Lk 24:1-11; Jn 20:1-10) Heng atang hian thlan hi a ruak a ni tih kan hre thei. Tin, hnialna dang a la awm thei tho mai a. Thlan kha an hai palh a, Isua thlan ni lovah an kal a ni tiin! Nimahsela thlana an dah laia hmuhpuitu leh hriatpuitute an nih avangin hei hi chu a paihthla nghal a ni. Tin, a vengtu (Guard) ten reports tha tak min hnutchhiah a, a vengtute hian thlan chu a ruak ngei a ni tih an hmu (eye witness) ve tho va, chu chu puithiamte hnena an report kha a ni a.

2. Thamna hial lak a ngai asin!: Isua thlan ruak chungchang an hriat veleh a vengtute zinga thenkhat chu puithiam lalte hnenah

hmanhmawh takin an va hrilh a. Anni ho pawh an lo mangang hle tih kan hmu! Ruahmanna an siam chuk chuk a nih kha. Thlan vengtute chu an tham a! an muthilh hlanin Isua ruang chu a zirtirten an ru bo, tia sawi turin an hrilh ta a ni. Hei hian chiang takin kan Lalpa chu a tho leh a ni tih a tar lang.

3. Archeological evidence chungchang thu-ah chuan:

Judate danah hian an chhungte thi tate ruhro hi an khawm thin a, bur pakhatatah (ossuary) an dah khawm thin a ni. Chu chu Lalpa Ni (the day of the Lord) atana an lo tih thin a ni a, thawhlehma an rin vang a ni (Eze 37:7-10). Hemi chungchang thua hian Isua thlan a ruah avang hian hetiang tih hi a awm lem lo a ni tih kan hria. A ruhro pawh khawm a ni tih kan hre lem lo ve, archeological evidence a awm loh avang tak hian kan Lalpa hi a tho leh a ni tih a lang e.

4. Chhinchhiahna(record) hrang hrang aţangin :

Mi hrang hrang heng Matthaia, Marka te record aţanga a lan dan hian Isua hi hmeichhia te, zirtirte, Mary Magdalene-i hnenah te a inlan a, tin Thoma hnenah pawh a inlar thu kan hmu baw k a. Dr.

Luka record-ah hian Kleopa leh Emau kawnga a kalpui zirtir pakhat hnenah a inlan thu kan hmu baw k a. Vana a lawn dawnah khan zirtirte hnenah a inlan thu kan hmu baw k a. Midang tam tak hnenah a inlar baw k.

Ka tlantu chu a nung:

Isua thawhlehma avangin Pathianni(sunday) chu a thawhlehma hriatrengna atan ni thar/ni serh a lo ni ta a. Kohhran a lo ding ta zel. Zirtirte leh ringtute pawh martarin an thi a. Dawt phuahchawp an awih avanga huaisen an ni love. Isua thawhlehma vangin an hmuh leh an hriat chu sawi lovin an awm thei lova, nung tura thihpui an huam a ni.

Kan hnenah nungin a awm a, a thih leh thawhlehma avangin chatuan nun kan nei a. Vawiin thlengin thlarauin kan hnenah a awm reng a. Kumkhuain khawvel tawp thleng pawhin kan hnenah a awm zel ang.

"A nung ka hria ka tlantu duh tak, Khawwêlah ro a rêl leh ang; Min pe ngei dâwn chatuana nun hlu, Ropui leh thuneihna a chang."
(KHB No.170)

Tuikual Pastor Bial Zaipawl Guwahati zin report

— James Lalrinawma
Leader, Tuikual Bial Zaipawl

Bial Zaipawl feh chhuah hi thil hautak deuh mai a ni a, hmun hla taka feh chhuak tur phei chuan ralpui phiar tak tea phiar ngai a ni ve a. Kumin chu beisei lawk pawh awm lem lovin Pu C. Lalrosanga, Addl. Director General (Programme), N.E.Region, Doordarshan Kendra-in Guwahati lama feh chhuah theihna tur min ngaihtuahsak hlauh mai a. Bial KTP sumin zin chhuak dawn ila kan tlin mai loh tur thil a ni a. Rawngbawlna zau zawk leh zaipawl member-te tan pawh hmasawlna tur t̄ha tak a nih piah lamah hlauh nei turte kan la ni zui a. Pathian chungah kan lawm a; Pathianin a mite tana Aigupta rama kawng lo sial tur Josefa a lo dah lawk ang deuh khan kan tan Pathianin Pu C. Lalrosanga, ADG (P) min pe ni berin kan hria a, kan lawm hle a ni. Kan zin fo t̄hin; mahse, tun t̄um kan zin tur chu Bial KTP

Committee-in min remtihsak phat aṅging kan phur em em a, sap ram zin tur ang maiin kan helhhawlh a ni ber e.

March ni 12, 2014 (Nilaini) zarah Guwahati panin Aizawl City Bus hmangin kan chhuak a, zing lamah kawng chanve kan thleng chauh mai. Ni 13.3.2014 (Ningani) tlai lamah Guwahati Synod Guest House nuam takah kan thleng a ni.

Ni 14.3.2014 (Zirtawpni) zing khua a lo var chuan kan mut hlanin kan taksa kham zawng zawngte Lalpan min tihdamsak vek a ni. Hemi nia DDK Station, Guwahati kan va thleng chu zan lama kan t̄awngtairualna rah kan hmu a, kan tuang em em zel a, kan tih tur ber zaipawl hla record pawh Pathian zarah tuang takin kan ti thei a. Chu bakah kan zai hlauh pawh cheque-in min pe nghal mai a, an Office hna a chak kher mai. An phe vat vat mai a, Mizo Kristian Sawrkar hnathawkte hian entawn tur kan ngah hlein ka hria. Pu C. Lalrosanga Office-ah kan leng lut a, thingpui min inpui mah kan lawm tawh nak alaiin AIR Shillong a phone a, "Hei Tuikual Pastor Bial Zaipawl te hi Thawht̄anah an lo haw

chhoh pahin hla lo record-tir ta che u," a tia. Contract dang min pe leh chu a ni der mai a. Kan nui ver ver mai a ni.

Inrinni hi hun awl mah ni se zingah ṭawngṭairualna kan nei thlap a, chhun lama kan han Bazar pawh nuam kan ti hle a ni ang. Guwahati khawpui a zauh ve tehreng nen mi 22 lek kha kan inpel suau suau reng mai a ni. A ṭhenin Vai futui zuar thlengin saptawnga biak an tum bawk a; vai sumdawngcho hi dawn an nuam a, mahse Exclusive Show-room-a mi hi chu an dawn ngai meuh lo tih pawh kan ngaihtuah lo.

Synod Guest House, Guwahati enkawltu Pastor i/c Rev. K. Lalengmawia-te chhungkua an fel khawp mai. Inrinni zan aṭang hian Pastor Bial fan programme a ni bawk a, Kohhran Inkhawm (Chanchin Ṭha thlen Ni)-ah zai tura min beisei angin kan zai a. Zaia rawngbawl tura zin kan ni bawk a, zai kan inhuam bawk nen; a tuk Pathianni Chawhma Sunday School-ah pawh kan zai a. Chawhnu Lalpa Zanriah Sacrament Inkhawm-ah pawh kan zai leh a, tlai dar 3:30 KṬP Inkhawm-ah pawh zai kan

inhuam khawp a. Mahse, paper zir ho a nih avangin kan zai ta lo. Inkhawm erawh an tam lutuk a, Hall-ah pawh kan leng lo. Inkhawm zat an inchhiar dan erawh a dangdai ang reng hle. Pu Men-a Group zawng an ding phawt a; chuan 'Chawhma inkhawm lo, Chawhnu inkhawm lo, engmah keng lo' an tia an ṭhu phak phak mai a ni.

KṬP Inkhawm ban veleh AIR Quarters kan pan leh a, hetah hian kan zai hova, testimony ropui tak tak kan ngaihtuah a, amah Pu C. Lalrosanga testimony mawlh mai kha a ropui a, min hneh tlang a ni ang, kan zaikhawm boruak pawh a dang ta daih mai. Thlarau hnathawh ang zela min hruai thei kan Conductor Tv. Biaksailova'n zaiin min kaihruaia; Thlarau Thianghlimin hna a rawn thawk a, taksa chetna nen mittui nen ṭhu thei a ram pawh kan awm lo va. Zan dar 8:00 velah tihluihnain kan tawp thei hram a ni. Kan zai boruak hian kan Director pawh a hneh veleh chhawng a ni chek ang chu ni 25.3.2014 (Thawhlejni)-a DDK Aizawl-in Live tur Zaipawl Kutpui (Choral Festival), Vanapa Hall-a neih turah 'Praise

& Worship kaihruaia tel ve turin ka duh che u a ni," min han ti leh ta mai a, kan va lawm em.

Hemi zan hian dar 10:00 aţangin Guwahati Branch K P ten  awng ai tlaivar an buatsaih a, a tuk zingkara haw chho tur kan ni tih pawh ngaihtuah lem lovin kan tel ve leh a. K P member  awng ai tlaivar tura an rawn kalkhawm chu an tam teh e! Mizo  halai phaia lekhazir ngaihtuahawm tak tak te chanchin an sawi kan hre  hin a, Guwahati a Mizo zirlaite erawh chuan Pathian an ngaihsak hle a ni tih mit ngeiin kan hmu a. Muthlu an awm lova ning hmeh pawh an pu lo, an hruaituten programme an duang thiam bawka phur takin an  awng ai tlaivar a ni ber e.

Ni 17.3.2014 (Thaw tanni) zingah Guwahati kan lo chhuahsan a, Shillong-a kan hla record leh turte kan tihfel hnuin Shillong-ah bazar leh hmun hrang hrang kan tlawh leh hnuin Aizawl panin kan chhuak leh ta a ni.

Meghalaya state kawngpui te chu a  ha a, world class ni hialin kan hmu.

Anmahni pawh khuan New Zealand of the East an inti ve em ni kha? Mizoram kan lut chho a, kawng a zim a, a kual bawka, a chhe lai lah a tam. Mahse, kan ram neih chhun a ni a, thla a muang. Zo boruak thianga tluka nuam a awm lo.

Vairengte Check Gate "Inchhirna Gate" tia an sawi  hin chu zing lamah kan lo thleng ta, "Tuikual Pastorate Choir" tih hma lamah kan tar a, "Tuikual Pastor Bial" Flag kan tar bawka. Kristian  halai Pawl kan ni a, check ngai lo tura min ngai hi a ropui. Min rin ngamna avang pawh hian rinawm chhunzawm zel hi K P member zawng zawngte chuan kan tum tur a ni. Motor neitu leh Driver te pawh hian hetiang hi chu remchangah la lo se a  ha khawp mai. Rawngbawltu (Kristian) zinin Sawrkar phal loh leh Pathian duhloh zawng hawn hi a thianga lo a ni.

Kan  awng aina leh Bial chhung Kohhran mipuite  awng aipuina avangin tluang takin kan lo thleng a, a va lawmawm em! A rawngbawl hna thawh hi a va hlu em! Lalpa chu fakin awm rawh se  

KRISTIAN ṬHALAI PAWL : MISSION VENG BRANCH Diamond Jubilee FAK LAM INTIHSIAK

KṬP Mission Veng Branch chuan kan Branch Diamond Jubilee pualin Ram Pum Huap Fak Lam (Worship Dance) Intihsiak kan huaihawt dawn a. KṬP Branch tinah tel tura sawmna pek chhuah tum a ni a, lehkha la hmu lote pawh he Intihsiaknaah hian lo tel ngei turin kan sawm vek che u a ni e.

CHHINCHHIAH TURTE

Buatsaih chhan

- Fak Lam hi tunlai ṭhalait lawm leh rilrem zawng tak a nih avangin KṬP rawngbawlna ki pawimawh taka kan seng luh tak zel avangin
- Hlimawm leh hmuhdawm piah lamah, urhsun tak leh inthumna pawh zahawm tawh taka Hla thuchah chang chhuak ngei tur zawnga hmasawmna a nih beiseina avangin
- Biak Inah pawh entir tlak khawpa Pathian chawimawina leh biakna rilru min puttir thei tur zawnga kalpui deuh deuh ṭhaa hriatna avangin

Lawmman

- PAKHATNA : Rs. 50,000/- + Trophy
- PAHNIHNA : Rs. 30,000/ + Trophy
- PATHUMNA : Rs. 20,000/- + Trophy
- A tel zawng zawngte hnenah THUZIAK pek vek a ni ang

Intihsiakna Dan

- Branch intihsiakna a ni ang
- Branch tin aṭangin Team pakhat (1) zel chauh tel tur
- Team member zat bituk a ni lo (Dawhsan len zawng mila ruahmanna siam mai tur a ni ang)
- Entry Fee a awm lo
- Elimination Round leh Final Round a awm ang
- AACDIOST hmanga endik a ni ang
 - ▶ Assertion (hla thu chan chhuah dan)
 - ▶ Accessories (thuamhnaw leh hmanraw dang)
 - ▶ Creativity (ngaihtuahna themthiam)
 - ▶ Difficulty (awlai nge harsa)
 - ▶ Impression (thlirtute mit la leh ngaihtuahna hruai)
 - ▶ Originality (mahni irawm chhuak)
 - ▶ Sequencing (rimawi leh lam/che inmil)
 - ▶ Team Work (thawhhona ṭha leh inrualkhai)

- Hun vawn dik tur a ni
- Judge-te thutlukna chu thu tawp a ni ang

Elimination Round

- September 16 – 19, 2014 (chhunah) neih a ni ang
- Hla duh ber pakhat theuh hman tur a ni
- Music track intum chawp tur
- August 31 ral hma-in hla thu (lyrics) leh music-audio track hman tur tak theh luh vek tur
- Hla thu hi Mizo tawng a ni ngei tur a ni a, mizo phuah emaw lehlin emaw pawm vek a ni thung ang
- Hla/track hi minute 5 aia rei lo tur a ni
- Team khatin minute 10 (lam + inbuatsaihna) zel hun an nei ang.
- Hun tiam bawhpelh an awm chuan point paihsak theih an ni ang
- Finalist 10 thlan chhuah an ni ang
- Result puan zawh veleh Finalist te hnenah Final Round atan pawimawh hrang hrang hriattir an ni nghal ang
- Elimination Round hi Synfo *Hruaina Eng*-ah tih chhuah dan zawm a ni ang

Final Round

- KŦPMSV Diamond Jubilee lawmna December 8 – 12, 2014 inkar, zan remchangah neih a ni ang
- Finalist 10 te chu hla pahnih (2) - *hla chuam leh Kristian Hla Bu aṅanga thlan sa pakhat* - hmangin an intihsiak ang
- KHB-a mi hla chu Mission Veng Branch-in a lo thlang ang a, music-audio track inang hman tur pawh a lo siam ang
- Final Round Local Cable Networks (Zonet & LPS) kaltlangin LIVE-a tihchhuah tum a ni
- A hmuna final round intihsiakna en turin final thleng branch aṅangin mi 50 aia tam lo kal phalsak an ni ang
- Judge-te thutlukna chu thu tawp a niang

Pawimawh dang

- Ei leh in leh kalna senso, thlenna tur thlengin mahni inngaihtuah tur a ni ang
- Intihsiakna ngaih thutak tur a nih rualin Pathian chawimawina kawnga nasa zawka hma kan sawn theihna dah pawimawh ni flat se

V.L. Muanchhana
Leader (Mob: 9862976771)

Dr. Laldinlana Varte,
Secretary, (Mob: 9436141615)

Kristian Ṭhalai Pawl : Mission Veng Branch



HRINGLANG TLÁNG

Sakhaw mi tak pakhat hian luiptui kamah In a sa a, chutah chuan chengin Pathian a pâwl ðhin a.

Ṭum khat chu fur lai a ni a, tui a rawn lian a, a In velah chuan a tling ta po mai a; tui chu a len zel avangin chhuat te chu a rawn chîm dawn ta a. Chutih lai chuan a In bulah chuan lawnglêngin mi pakhat hi a rawn kal a, "Lo tlan chhuak rawh," tiin a rawn au va. Ani erawh chuan, "Ni lo ve. Lalpa'n hna a thawk ang a, min rawn chhan chhuak mai ang," tiin a lo chhang a.

Tui chu kâm a hnêkin a tam zel a, chhuatte chu a rawn chîm ta pung pung mai. In neitupa chu a in chungah a lâwn leh a. Chutih lai chuan a lam panin lawnglian hi a lo kal a, lawngliana chuante chuan, "Rawn zuangthla thuai rawh. I thih hmâin kan chhanhim ang che," an ti a. Mahse, ani chuan, "Lalpa a awm alawm. Eng emaw tal tiin min rawn chhan chhuak mai ang," tiin a lo chhang leh a.

Tui chu a lian zual zel a, in chungte paroh chu a rawn chîm phak ta hial a. Ani chu meikhuchhuah dâwtah a lawn leh zel a. Nakinah chuan helicopter hi amah khai chhuak turin a rawn thlawk a, a uai chhoh nan hruizên an rawn thlak a. "Rawn uai chho rawh, kan chhan chhuak ang che," an ti a. Nimahsela, ani chuan a ngai te bawokin, "Lalpa a awm alawm," ti bawokin a lo chhang leh a.

Tui chu a lian zel a, tlan chhiatna tur dang a awm tawh loh avangin a tawpah chuan chu pa chu tuiah chuan a tla hlum dawn ta nge nge a. Thei leh thei lovin van lam a hawi a, "Lalpa, ka nghak reng che a, engati nge min chhan chhuah nan eng mah i tih loh?" tiin Lalpa a chhuahchhal a.

Lalpa chuan, "Lawng pahnih leh helicopter ka rawn tirh kha. A bak eng thil dang nge la ti leh chuang ila i tih?" tiin a lo chhang ta a.

■ ■ ■ RIMAWI

ZAIPAWL

rawngbawlna

— *Lalhminghsanga Vanchhawng
Chawngtlai Branch*

Zaipawl rawngbawlna hi ziaik hmuh tur leh chhiar tur awmin kan chanchinbuah pawh hian chhiar tur a awm ve leh zeuh zeuh ñhin. Conductor mawhphurhna, Zaipawl member-te mawhphurhna te kan hmu hlawm tawh ñhin a, tun ñumah hian zaipawl rawngbawlna hi eng ang chiaha pawimawh nge a nih han sawi dawn teh ang. Mizote hi an sawi fo ñhin angin zai ngaina tak hnam kan ni a, Kristian kan nih hma pawh in Mangkhaia zai te, Thlawitenâli zai te pawh kan lo nei tawh a. Sap missionary-te an rawn chhuak a, Kristian kan nih rual rualin hla phuah thei leh phuah thiam an rawn chhuak nghal mawlh mawlh a. Sap Missionary-te kaihhruaina bawkin zaipawl

lamah bul an ñan nghal a. Kum 1929 February thla khan Kohhran Inkhawmpui lian (Synod) Syhlet (tunah chuan Bangladesh a ni tawh)-ah Pi Zaii (Miss Katty Hughes) hovin zaipawl an kal tawh. Mizo zaipawl te chu thiam an ti em em a, India Hmar Kohhran phei chuan an ram fang turin an sawm nghal nghe nghe a ni. Hei hi Mizoram pawna zofaten zaia rawng kan bawlna hmasa ber niin an sawi ñhin. Solfa pawh an thiam chhawm ve nghal mai baw k a, KṚP a lo din chhoh hma leh a din hnu pawh khan zaipawl hi rawngbawlna ber leh ñhalai hui khawmtu ber a ni nghal. Kohhran ñhenkhat KṚP din mai lohnaah pawh khan ñhalai rualte chu zaipawl hian a lo ñhui khawm em em tawh a ni.

KṚP member-te hian zaipawl hi kan bul ñanna tur leh rawngbawla kan aw rawl leh tha kan sen ve hmasakna a ni a, tuna kan Pastor leh Upa tam zawk hi chu zaipawl aṅanga bulṅan zaipawlah, KṚP Committee-ah, KṚP OB-ah, T.Upa, Upa-ah chutianga in chhawp chhova KṚP bela

chhum hmin an lo tih fo thin te lo chhuahna hi zaipawl aţang hian a ni. KṚP-a la active ngam em em lotena kan tlangnel ţanna thin chu zaipawl hi a ni a, zaipawl hi tiang tak hian kalpuiin awm lo se chuan kan KṚP hruaitu ţha tak tak, kan Upa tam takte hi rawn chawr chhuak lovin khawi maw lai kilah an tawm bo vel mai mai dawn a lo ni reng mai. KṚP-a kan inhman vena remchang tak Lalpan zaipawl ţha tak min pe hi a van hlu em.

Mi thenkhatin zaipawl tena hla kan han zir tluk tluk mai te hi tul lo ti leh lo sawisel tawk hi an awm leh thin. Hla pakhat chu chen chen zir a ngai lo thiam har lutuk te hi min ti leh mai thin. Kei chuan heti zawnghian ka ngaihtuah, Pathian thlarau Thianghlim puihnaa nung taka zai kan duh chuan keimahni lam pawh kan inbuatsaih ve a ngai. Kan hla sak tur kha thiam lo viau ila, in lamah ţawngtai hnem tur ti ngawt ila zir chuang si lo ila hla kan rem hunah khan Pathianin kan hla kha hmangin kan zai kha a nung ngawt lo vang. Pathian

Thlarau Thianghlim puihna kan duh a, zaipawl nung tak nih kan duh chuan keimahni lam kan inbuatsaiha kan inpek phawt a, kan hla zir a kha kan thiam viau phawt a ngai. Ṛawngţaina nen tih tak zetin hla zir thin ila, chutah chuan kan Pathian, “I rah chin apiang i ram a ni ang” titu khan kan inpek nasata kan rah ngam phawt chuan a hun takah nung takin min zai tir em em ang. Zaipawla tel thin kan niha hla zir kan lo ning ngawih ngawih zel a nih chuan inenfiah kan ngai hle tihna a ni. Rawngbawlin kan chhuak ve kher thei lo a ni mai thei e, mahse zaipawl hi Pathianin kan rawngbawlinaa min pek; Amah kan hlat mai loha kan hnaih rengna tura Kohhrante kaltlanga rawngbawlina min pek a ni tih i hre thar ang u.

Kan Kohhran Inkhawmpui hrang hrang hi zaipawl tel lo chuan a hlawhtling tawh lo va. Inkhawmpuiaha zaipawl a tam thei lutuk tihte a awm fo thin. Chumi a nih rualin zaipawl member-te an kal tel loh chuan kan inkhawmpui

pawh kal tur kan tlem ta niin a hriat a. Hmanah chuan Presbytery inkhawmpuiah te hian mihlim nu leh pa eng emaw zat kha an kal thin a, hmun tam takah hetiang hi a awm ngai tawh lo a ni awm e. Zaipawl kan kal tel loh chuan Rorela kal Upate bak inkhawmpui tur kan awm tawh lo emaw tih a ni a. Inkhawmpuia kan zaia hla kan rem mai piah lamah hian inkhawmpui tihlawhtlinga inkhawmpui titamtu, tihlutu kan ni. Zaipawl rawngbawl na hi a van pawimawh em! Ingai hluin i hlut deuh deuh ang u.

Tin, Pathian faka hla sak ho hian ringtute a tipumkhat a, in unauna pawh a lantir a, thu ngawta fiah lo kha a thluk a lo tel khan a lo fiah em em thin. Zaipawlin hla kan rem te hian ngaithlatute nen rilru hmun khat puin Thlarau hmun khat changin kan awm a. "Haleluiah! Amen!" kan pe thei thin a lo ni. Kan zai lamtualala kan ding chhuak te hi kan va zai mai a ni lo va, min lo ngaithlatute nen khan Pathianin thlarau hmun khatin min pawl thin a, KṚP member Kohhran Zaipawl te

hi Kohhran tan hian kan hlu em em a ni.

Zaipawl hi Bible-ah pawh hian a lang hma hle. I Chronicles 6:31-ah chuan Davidan Temple zaipawl a ruat thu kan hmu. Zaia rawngbawl na hi keini zofate tan bik hi chuan a van hlu leh zual em! Zaipawla tel ve theia kan awmte, kan aw zaipawl hmanga amah fak nana hmang ve theia kan awmte hi a van hlu em. Tam tak hi chu zaipawl hmang lo hi chuan Pathian faka zai vena tur pawh kan nei lo. Zaithiam lo ve tak takte pawh kha zaithiam te karah Pathian fak hla nalh leh mawi takin kan han sa thin a nia! a hlu thlawt a ni. Zaipawla kan inhman vena remchang hi chu awm lo se chuan mite hmaa Pathian fak hla puan chhuahna remchang hi a vang duh ngawt ang. Pathian kan fak a, a rawng kan bawl vena remchang Kohhran leh KṚP-a bul kan tan vena remchang Zaipawl tha tak kan nei hi KṚP member-te kan vannei thlawt a ni. Tiṭha peih vak lo kan lo nih pawhin, hawh u, tan i la thar zel ang u♦

HRISELNA ■■■

Mut tlêmin taksa a nghawng dan

— Joel Lairemsanga
Mualkawi Br. KÏP

Taksa dik tawk loh vang te, hnathawh nasat vang emaw leh thil dang vang tein kan taksa hian mut a lo kham lo thei ðhin a. Tunlaih phei chuan hmasawna hmanraw changkang hrang hrang vangin ðhalai tam tak phei chuan ðul lem lovah zan kan meng rei em em a, chhun lamah kan hna ngaiah a hun pangngaiah te chhuak ve leh tho si kan awm nual ta mai. Tun ðumah hian taksa mamawh tawk mut lohin mihring taksaah nghawng a neih dan kan zir ho dawn a ni:-

1. Rihna a tipung: Zannah darkar sarh aia tlem mu ðhinte tan taksa rihna a pung duh bik hle. Kan taksaah hian protein chi khat, 'leptin' a awm a. Hei hian taksa khawlpui hnathawh leh chaw eituina te a thunun a.

Kan mut tlem chuan taksa hnathawh (metabolism) a lo muangraih mai a, kan chaw ei a lo la tui tho si chuan thau vak mai loh chu thil dang reng a awm lo. Mi inthazo lo leh thawk lama harsatna tawk kan lo ni thuai mai dawn tihna a ni. Rihna a pun thur thur chuan zunthlum neihna chance pawh a sang tihna a ni mai.

2. BP sang neih a awlsam: Zir chianain a tar lan dan chuan taksa mamawh tawk aia tlem kan mut chuan darkar 24 chhung ngeiin kan Blood Pressure (BP) a rawn khawih buai nghal pang a, a lo rei hnuah phei chuan lung natna hrang hrang a thlen ðhin. Chuvangin darkar ruk (6) aia tlem i mut a, chhun lamah i hna pangngai i thawh leh bawh chuan BP sang i lo nei thuai dawn a ni.

3. Rilru hah a thlen: Duhthusama rei kan mut loh chuan rilru a lo hah hma bik em em a, thil ho te teah thinrim mai a awlsam. Hei hi eng dang vang ni lovin kan mut tlem avanga kan taksaah Stress Hormone a lo insiam pun vang a ni.

4. Taksa ralveng khawl a tichak lo: Mut kan kham loh chuan kan taksa ralveng khawl (immune system) hian a tuar hma hle. Taksa chu hritlang mai mai lakah pawh a lo sihnip thuai thuai a, hritlang neih nghal zel a ni mai. Khawsik hi kan taksa tan hian thil t̄angkai tak a ni a, kan taksain natna a bei mek a ni tih lantirtu a ni a, natna hrikte a tihlum t̄hin. Mut tlem chuan kan taksa hian khawsik hi a siam mai thei t̄hin lova, natna hrik te an lo chak ta t̄hin a ni.

5. Thawh at a awlsam: Mu tlemte zingah thawh-at hi a hluar zual hle. Mut laia rilru harhfim kar si; nimahsela taksa che thei si lo, aw pawh chhuah theih si loh leh maimizial kan tih te hi a lo awm thuai t̄hin.

6. Inlaichinna a tichhia: Mut tlem chuan kan nguai bur mai a, t̄hianten leng chhuak tura min sawm pawhin kan che chhuak peih lo va, chhungten min biak pawh kan chhang t̄ha peih t̄hin lo; hei hian inchung khura kan inlaichinna thlengin a tichhe zo thei a ni.

7. Thluak hnathawh a tibuai: Thluak hian hna tam tak a thawk a, heng a hnathawh zawng zawng deuhthaw hi mut tlem luattukna hian a tibuai t̄hin a ni. Hriatrengna a tihbuai leh haihawttakamin losiam tamai t̄hin hi a tihbuai langsar chu a niawme.

8. Lirthei chetsualna a thlen: Mut tlem avanga taksa leh thluak hnathawh a lo nguai t̄hin avangin kut thunun thlengin a lo buai zova, accident tawh a awl ta hle t̄hin. National Highway Traffic Safety Administration-in a tarlan dan chuan Motor Car accident 100,000 zinga accident 72,550 hi chu driver mut kham lo te vang a ni.

9. Taksa a tithang chak lo: Kum 1999 a mi thiamte zir chiannain a tar lan dan chuan mut tlem luatna hian taksa t̄han a timuang thei a ni.

10. Taksa hliam a tidam har: Kum 2005 a mi thiamten sazu-a zir chianna an neih chuan a taksa mamawh tawh mut hmu lo sazu-a hliam chu a thian dangte aiin a dam har zawk tih a ni. Mihringah erawh zir chian mek a ni.


Mut dan tha-

- (1) Electric Bulb te hi tihthim vek tur a ni. Zan laiah zunachhuah avanga bual in-a kal a ngai a nih pawhin Electric Bulb te hi *on* loh tur; hei hi a chhan chu rei lote light on pawh hian kan tak saa melatonin hnathawh a tibuai thin a ni. Melatonin hi taksa thau lutuk tur thununtu pawimawh tak pakhat a ni.
- (2) Mut pindan hi a vawt deuh raih tur a ni a, 70°F aiin a lum tur a ni lo.
- (3) Sana chekring chi hman loh a tha.
- (4) Alarm Clock kan set duh a nih pawhin khum a tanga ft. 3 tala hlaah dah tur a ni.
- (5) Mut rei zawng duh thusam chu darkar 7½ to 8½ hi a ni.
- (6) Tleirawl (teenagers) te chuan darkar 9 ½ an mamawh thung.
- (7) American Cancer Association ten an hmuh dan chuan darkar 6 aia mu tlem leh darkar 9 aia mu tamte hian

cancer an nei awlsam zawk a nih chu!

- (8) Coffee leh zu te hian rilru an chawh harh avangin pumpellh ngei tur a ni. Zu hian a tirah chuan mut han tichhuak ve mahse a hnu lawkah rilru a tiharh leh zawk si a ni.
- (9) Mut hma darkar hnih (2) a tanga chuan eng mah ei tawh loh a tha.
- (10) Taksa sawizawi that hi a pawimawh hle baw.

Aw le, sawi tur tam tak awm mahse i duh taw phawt teh ang. Mut tlem luattuk that loh dan pawh kan lo hre ta baw a, tul leh pawimawh em em si lova pawngpaw zan men rei em em te hi sim a tha khawp mai. Hma taka mut a, zingah hma taka thawh leh hi a hrisel a ni tih hi thu dik ding lai reng a la ni. Eizawna avanga loh theih loh a zan lama kan men rei emaw, tlaivar hial pawh a lo ngai a nih pawhin taksa mamawh taw chu mutna hun insiam chawp ve leh mai thin tur a ni e♦



KANTU

Champhai Vengthlang North
Branch

Champhai Vengthlang North Branch KṚP hi Champhai Vengthlang Pastor Bial KṚP Branch pali (4) zinga naupang ber niin, kum 2007 November ni 25-a Champhai Vengthlang Kohhran aṅanga Vengthlang North Kohhran a indan hnu ni 2nd December 2007 khan Kohhran Committee chuan Champhai Vengthlang North Branch KṚP hi a din a. Kum 2014 hian member 257 (Mipa 147 leh Hmeichhia 110) an awm meka, Branch Committee-ah hian member-27 (OB-6, Committee Member 19 Kohhran Committee aiawh 2) an awm a. Kohhran huam chhung hi Bial 6- ah ṭhenin Bial tin hi Committee Member pakhat ṭheuh in an enkawl a, anni hian Kristian Ṭhalai Chanchinbu te sem in Faith Promise te an khawn ṭhin. Branch hnuaiah hian Sub Committee 7 siam a ni a, chungte chu

Programme, Refreshment, Music, Reception, Decoration, Evangelism, Documentation & Literature sub-committee te an ni.

KṚP member hi Group 3 a inṭhenin Matthaia, Marka leh Luka Group-ah te an inṭhen a, Group tinah hian Branch OB 2 zel Branch Represent-in an awm a. Group tinte hi Budget ₹13,000/- tuk an ni bawk a. Tin, Group inelna chi hrang hrang an nei ṭhin a, Thawṭṭan zan, Nilai zan, Inrinni Zan, Pathianni Chawhnu, Fellowship, Hla zir leh Branch hnatlangah te kal ṭha inelna an nei ṭhin. Hei bakah hian Branch Committee in intihsiakna hrang hrang a siamte hmangin inelna an nei ṭhin bawk. Kumin hian Thawṭṭan zan vawi khat chu Group Members Meet neih nana hman tum a ni bawk.

Thawṭṭan Zan hi Sermon inkhawm leh Central KṚP-in Thupui tur a ruahman zirna hun

atan hman thin a ni a, Pathianni tlaiah hian Ṭawngṭai Inkhawm leh Fellowship neih thin a ni. Thla tin hian Thawhtan hmasa ber tlaiah member hlate pualin Chawnghei ṭawngṭai an nei thin a, thla khata Pathian ni hmasa ber tlai fellowship-ah Decoration pual thilpek lak khawm a ni bawṭ thin.

Kumin (2014) hian Branch Budget atan ₹4,00,000 an dah a, kumin hian Project 3 an nei a chungte chu – Ramthar Project, Sound System tihchangtlun leh Kohhran tihchangtlun te an ni a, Ramthar Project hi kum 2010 aṭang khan Mizoram Rural Bank ah Term Deposit in kum tin ₹10,000/- dah thin a niin, kumin pawh hian dah leh tura ruahman a ni. Kumin hian kum puan atan *'Inkhawm Uar Kum'* tih an hmanga. Kumin (2014) chhung hian Rimawi Kutpui, Literature Night hman tum a ni bawṭ.

Kohhran zaipawl ṭha tak an nei thei a, zaipawl member hi 60 aṭanga 80 inkar vel an ni tlangpui, kumin chhung hian Kohhran Zaipawl-te hian Music Video siam an tum bawṭ. Hlazir an tam zawṭ theih nan member aṭangin hla zir kal ṭha/tam ber

hnenah lawmman pek an tum. An Branch member aṭang hian Senate of Serampore hnuai ah B.D-2, B. Miss-1 zir chhuak an nei mek a, hei bakah hian D.Th-1, B.D-2 leh B. Miss-1 leh M. Div - 1 ten an zir mek bawṭ. Tunah hian SMB kal tlangin Missionary 7 an chawm mek a. An Branch member 3 te chu Synod Mission Board hnuai ah Missionary a chhuak an nei mek bawṭ. An Branch Member Biak Inhawnga inneite hi thilpek an pe thin bawṭ.

Kristian Ṭhalai chanchinbu copies 79 an la mek a. Branch Naupang tak an la nih vangin member-te an inlungualin an thawh hona a ṭha hle a, Group leh Sub-Committee hrang hrangte'n anmahni hmazawn ṭheuhah hma chak takin an la a, hei hi an branch tichaktu pawimawh tak a ni. Kumin chhung hian ṭawngṭai tlaivar neih leh an tuma, hetih rual hian an branch member-te Bible chhiar chhuak hnenah lawmman ṭha tak an pe thin bawṭ. Tin, Central KṬP leh Bial KṬP aṭanga tih tur an rawn tuk te ṭha takin an ti thei ve zel bawṭ a ni♦

Keimahni



■ *Conference hmanpui* : March 21-23, 2014 khan Kristian Khanglai Pawl General Conference vawi 8-na hmanpuiin New Lamka (Churachandpur, Manipur)-ah Leader Rev. J. Lalremsiama a kal a. March 23 (Inrinni) zan inkhawmah Central KṚP aiawhin chibai bukna leh thuchah a sawi.

■ *Charge inhlan* : April 25, 2014 (Zirtawpni) khan kum 2012-2014-a chhunga Kristian Ṭhalai Editorial Board leh kum 2014-2016 chhunga Kristian Ṭhalai Editorial Board tharte KṚP Office (Synod Office)-ah charge an inhlan. Chanchinbu enkawltute i ṭawngṭaipui ṭhin ang u.

■ May 5-11, 2014 chung khan Venghlui Branch chuan Diamond Jubilee an lawm a. May ni 5, 2014 (Thawhṭan) zan khan Upa Zonunmawia, General Secretary-in Jubilee Souvenir (Magazine) a ṭlangzarh a, May 11, 2014 (Pathianni) zanah Rev. J. Lalremsiama, Leader-in thuchah a sawi a ni. Leader hi Synod Choir ten ṭawiaawmin Venghlui Branch hian zanriah an lo buatsaisak a ni.

■ KṚP Diamond Jubilee Documentary film leh Jubilee Gospel Concert dvd chu peih fel a ni ta. May 8, 2014 (Ningani) 2:00pm khan Synod Moderator, Rev. K. Lalmuchhuaka'n J.M. Lloyd Hall, Synod Office-ah hlanna a nei. A pahnih (inkawp) hian Rs. 150/-a hralh chhuah a ni a, KṚP Office, Synod Bookroom leh Diginet, Mission Vengthlang (contact 9862957574) ah lei theih a ni. Zuar chhawng duh tan Diginet-ah hian DVD pahnihah Rs. 30/- hlepni Rs. 120/- in a lak chhuah theih bawk.

■ *PCI General Assembly Vawi 41-na* : India rama Presbyterian Kohhrante inzawm khawmna Presbyterian Church of India (PCI) Inkhawmpui kum khat dana neih ṭhin, Biennial General Assembly vawi 41-na chu April 30 - May 4, 2014 chhung khan Laitumkrah Presbyterian Church, Shillong (KJP Synod Mihngi)-ah neih a ni a, thupuih 'Prophetic Role of the Church Today' tih an hmang. Inkhawmpuih hian Mizoram Synod aṭangin palai 380 vel an tel a ni. Central KṚP aṭangin Pu Samuel Laldingliana, Asst. Leader, Tv. R. Lalramnghaka, Fin. Secretary, Pu C. Laldingliana, Comtt. member te an kal a, Synod Choir ṭum 4 an zai bawk.

CENTRAL K.T.P HRUAI TUTE, 2014 – 2016

Office Bearers

Leader	:	Rev. J. Lalremsiama	9862669230
Asst. Leader	:	Pu Samuel Laldingliana	9436198740
Gen. Secretary	:	Upa Zonunmawia	9436152024
Asst. Secretary	:	Dr. Lalliansanga	9612241873
Treasurer	:	Dr. Julie Remsangpuui	9436142235
Fin. Secretary	:	Tv. R. Lalramnghaka	9436351374

Committee Members

Pu R. Lalruatkima	9436360571	T.Upa Richard B. Lalhriatpuia	8974287347
Pu C. Laldingliana	9436140834	Upa K. Rorelkima	9436153444
Pu Lalthangvunga Sailo	9862381275	Pu V. Lalrinmawia	9862563362
T. Upa T. Lalawmpuia	9436366519	Pu Ngurhmingliana	9436374104
Tv. Joseph Lalsangzuala	9436152063	Pu Vanlalpeka	9436153728
Pu Lalchhuanliana	9862364583	Pu K. Lalruatpuia	9862577177
Pu P.C. Biakmuanpuia	9436374833	Pu Zonunsanga Ralte	9402113038
Pu Lalmanpuia	9436142398		

Ex-Officio Members

Rev. K. Lalhmuchhuaka	–	Synod Moderator
Upa H. Zoliana	–	Synod Secretary (Sr.)
Rev. P.C. Pachhunga	–	Executive Secretary, i/c KTP



Kantu – Champhai Vengthlang North Branch



Postal Regn. no. MZR/81/2012-2
RNI No. MIZMIZ/2009/29



Kristian Thalai Editorial Board (2014-2016) leh kal chhuakte



General Secretary Upa Zonunmawia'n Venghluai Branch
KTP Diamond Jubilee Souvenir (Magazine) a tlangzarh



55th General Conference-a zai hruaitute